

19. oktober 2007

UKA 2007/35

Pisortanut akiitsut akilersinniarneqartarnerat pinaveersaartinneqarnissaallu pillugit Inatsisartut inatsisaata allannguutissaatut Inatsisartut inatsisaattut siunnersuut.

(Nunamut tamarmut atuuttuusumik akiliisitsiniarnermi oqartussaasoq)

pillugu

Inatsisartut Akileraartarnermut Akitsuusiisarnermullu Ataatsimiititaliaata

ISUMALIUTISSIISSUTAA

siunnersuutip aappaaneernejarneranut tunniunneqartoq

Inatsisartut Akileraartarnermut Akitsuusiisarnermullu Ataatsimiititaliaat suliarinninnermini ukuninnga inuttaqarpoq:

Inatsisartunut ilaasortaq Kristian Jeremiassen, Atassut (siulittaasoq)

Inatsisartunut ilaasortaq Juliane Henningsen, Inuit Ataqatigiit

Inatsisartunut ilaasortaq Lene Knüppel, Demokraatit

Inatsisartunut ilaasortaq Ole Thorleifsen, Siumut (sinneissusaq)

Inatsisartunut ilaasortaq Ruth Heilmann, Siumut (sinneissusaq)

UKA 2007-mi siunnersuutip siullermeerneqarnera tunngavigalugu inatsisissatut siunnersuut kiisalu inatsimmut nassuiaatit, tusarniaanermillu atortussat Inatsisartut Akileraartarnermut Akitsuusiisarnermullu Ataatsimiititaliaata misissuataarpai.

Tusarniaaneq.

Siunnersuut piffissami apriilip 26-aniit maajip 30-at 2007 ilanngullugu tusarniaassutitut nassiunneqarpoq. Tusarniaanermut akissutigineqartut nuutinneri oqaatsit allassimaneri atorlugit Akileraartarnermut Akitsuusiisarnermullu Ataatsimiititaliamit tiguneqarput. Tusarniaanermi akissutigineqartut inatsimmut nassuiaatini nalinginnaasuni Naalakkersuisut oqaaseqarfigaat. Tusarniaanermut piffissaliineq tusaarniaaffigisassatullu toqqakkat ataatsimiititaliamit oqaaseqarfiginissaat pisariaqarsimannngilaq.

Siunnersuutip Inatsisartuni siullermeerlugu suliarineqarnera.

Inatsisissatut siunnersuut Inatsisartut siullermeermassuk partiit Siumut Inuit Ataqaatigiillu tapersiipput, Kattusseqatigiilli Partiiat itigartilluni. Partiit Atassut Demokraatillu apeqqutinik assigiinngitsunik nalornissuteqarnermillu saqqummiipput.

Aningaasanut Nunanullu Allanut Naalakkersuisup oktobarip 16-ani 2007 allagaqarluni siunnersuutip siullermeerneqarnerani apeqqutit saqqummiunneqartut itisilerissutaasumik akissuteqarfigai. Naalakkersuisup allagai isumaliutissiisummut matumunnga **ilangussaq 1**-voq.

Tassunga atatillugu inatsimmut piffissaq atuutilerfissaq aprilip aallaqqataa 2008-mut kinguartinneqassasoq siunertaralugu allannguutissatut siunnersuuteqarnissartik Naalakkersuisut ilimasaarutigaa. Nuna tamakkerlugu qarasaasiaqarnikkut aaqqissuussamik ataatsimoorussamik atuinissaq aallaqqaataaniit taamaalilluni ajornarunnaassaaq kiisalu pisassat, akiligassat il.il. kommunit akiliisitsiniartutullu oqartussaasup akornanni qarasaasiakkut nuunneqarsinnaanissaat qulakkeerneqassalluni.

Akileraartarnermut Akitsuusiisarnermullu Ataatsimiititaliamit isumaliutigineqartut.

Siunnersuutip siullermeerneqarnerani ajornartorsiuteqarfiit ataasiakkaat saqqummiunneqartut Akileraartarnermut Akitsuusiisarnermullu Ataatsimiititaliamit imaattunik oqaaseqarfigineqassapput.

Suliassaqarfiit kommuninit namminersornerullutik oqartussanut nuunneqarnissaannik, kommunit taakkulu soqutigisaqaqatigiittut kattuffiata KANUKOKA-p isumaqatiginngisaannik, Inatsisartut isummeqqullugit qinnuigineqarpata tamanna tunngaviusumik isigalugu pitsaasuunngilaq. Allannguutikkullu kommunit aningaasatigut pigisaminnik atuisinnaanerit, tassungalugu ilanngullugit aningaasanik pisassanut kalluarneqarpat pisoq immikkut ernumassutissaqalersitsissaaq. Kommunit susassaqaqarfimminnik nammineerlutik aqutsinnaatitaanerit kommunit aningaasalersuinikkut nammineersinnaaneranni tunngaviuvoq pingaartoq, taamatullu piginnaatitaaneq inatsisit tunngaviusut § 82-atigut kiisalu kommunit aquunneqarnerannut inatsisikkut qulakkeerneqarsimalluni.

KANUKOKA tusarniaanermut akissummini akiliisitsiniartarnermik aaqqissuussinnerup maanna atuuttup siunissami pitsaanerujussuarmik atuilersinnaaneranut tunngavilersuutinik pissutissaqarluartunik saqqummiussisoq Akileraartarnermut Akitsuusiisarnermullu Ataatsimiititaliaq isumaqarpoq. Siullermik kommunit nammineq kattuffeqarnerat atorlugu kommunini akiliisitsiniartutut oqartussaaffik nukittorsarneqassaaq, kommunerujussuarnummi sisamaannanut ingerlatsiviit katersorneqassammata. Taakkuttaarlu pisassamaatinik qara-saasiat paasisutissanik qitiusumik katersuviup pilersinneqarneratigut, IT-lu torlugu aaqii-nermik atuutilersitsinikkut kiisalu namminersornerullutik oqartussani qitiusumik immikkut paasisimasallit ataatsimut qanimut suleqatiginerisigut patajaallisaqqinneqarsinnaapput.

Akiliisitsiniartarnermut oqartussaaffiup kommuniniitinneqarnerani iluaqutissat KANUKOKA-p eqqortumik tikkuavaigai, minnerunngitsumik akiligassallit akiliisinnaassuseqavinnerannik naammaginartumik naliliknissamut kommunit ilisimasanik peqarlutillu najukkani inuiaqatigiinnut attaveqarnerat. Inatsisip allangortinneratigut sukaterinikkut iluaqutissanik Naalakkersuisut naatsorsuuteqarnerat KANUKOKA-mit qularutigineqarpoq, ilaatigut taanna ingerlatsiviit suleqatigisallu nutaamik aggulunneqarnerannik pilersitsissammat. Ingammillu sulisorisat ikililikkat atorlugit namminermt tunngassuteqanngitsunik akiliisitsiniarnernik suliassarpassuarnik kommunit isumaginnittariaqartuarnissaat ernumassutigineqarpoq. KANUKOKA soorunami isumaqarpoq ataatsimoorussamik kommunerujussuannngortussani inissisimaffilimmik akiliisitsiniartarfinnik peqarnissaq aaqqiinerussasoq imminut akilerluarsinnaanerpaasusaaq.

Isummanut taakkununga illua tungiliuttuupput akiitsunut kinguaattoorutininik akiliisitsiniartarnerup piaartumik pisariillisaavigineqarnissaanik, kiisalu innuttaasunut sullivinnullu akuleruffiginnittarnerit oqimaatsorsiutaagajoqisut eqarsaatigalugit akiligassallit inatsisitigut illersugaanerisa pitsanngorsarnissaanik Namminersornerullutik Oqartussaat kissaataat.

Akiligassanik kinguartoorutit katillugit aningaasartaat kommunit ukiuni kingullerni akilersissinnaasimanngisaat amerliartuinnarsimapput ernumanartorujussuarmillu annertussuseqqalersimallutik. Akiligassanik kinguaattoorutininut takussutissiaq kingulleq isumaliutissiisummut matumunnga **ilanngusaaq 2-tut** ilanngunneqarpoq, naatsorsuutigineqarmammi kisitsisit eqqornerusut ukiup ingerlanerani kingusinnerusukkut pissarsiarineqassasut. Soorlu takuneqarsinnaasoq katillugit kommuninut akiligassanik kinguaattoorutit piffissami 1997-miit 2005-mut marloriaataat sinnerlugu amerlillutik 600.000.000 kr. qaangersimavaat. Tamanna tunngavigalugu akiliisitsiniartarfeqarnerup qitiusumut inissinneqarnissaanik Akileraartarnermut Akitsuusiisarnermullu Ataatsimiititaliap kaammattuuteqarneranut tunngavimusimavoq, tassungalugu atatillugu ilaatigut oqaatigalugu:

"Akiliisitsiniartarnermik suliassaq

Akiliisitsiniarnernik suliassat tamakkiisumik ilaannakuusumilluunniit piffimmut ataatsimut eqiterneqarnissaannut periarfissaq Naalakkersuisut akissuteqaamminni isummerfigisimanngilaat. Akiliisitsiniartarnermut tunngasut akileraartarnermik suliassat eqiterneqarnerannut ilanngunneqarnissaat tulluurtuusooq Akileraartarnermut Akitsuusiisarnermullu Ataatsimiititaliap maannakuugallartoq isumaqarpoq. Tamanna tunngavigalugu akiliisitsiniartarnermut pisassarisanullu tunngasut akileraarusiisarnepup eqiterneqarneranut ilanngunneqarsinnaanerannut periarfissanik sukumiisumik misissueqqullugit Naalakkersuisut Akileraartarnermut Akitsuusiisarnermullu Ataatsimiititaliamit

kaammattorneqassapput. Tamanna pisinnaavoq UPA 05/18-ip, tassalu *kommunit akiligassiissutinik akiligassiisarneq akiliisitsiniartarnerlu pillugit suleqatigiinnissaat pillugu Inatsisartut inatsisissaattut siunnersuutip* sunniutissaanik 2005/2006-imi naliliinikkut. Siunnersuut kingullertut taasaq pisassarisanik akiliisitsiniartarnerup pitsanngorneranik kinguneqanngippat akileraartarnermut tunngasunik eqiterinissap aggersup ilaatut akiliisitsiniartarnermik suliaasat eqiteriffigineqarnissaannut siunnersuutinik pisariaqartunik Naalakkersuisut saqqummiussinissaat Akileraartarnermut Akitsuusiisarnermullu Ataatsimiititaliap naatsorsuutigaa."

Oqaaseqaat UPA 2005/113-mut isumaliutissiisummi saqqummiunneqarpoq (Aningaasarsianit akileraarutit pillugit inatsisip sunniuteqarluarnerulluni malinneqalernissaanik Naalakkersuisut sulissuteqaqqullugit Inatsisartut aalajangernissaannik siunnersuut, taamaaliornikkut makku qulakkeerneqaqqullugit: Aningaasarsianit akileraarutit pillugit inatsisip naapertorlugit Kalaallit Nunaanni innuttaasut tamarmik assigiimmik pineqarnissaat; Akileraarutit A-t sulisitsisunit aningaasatut tigoraaannartut atorineqarsinnaannginnerat naqissuserneqassasoq; Kommunit akileraaruserinermik suliaqartut suleriaasii assigiissaartunngortinneqassasut, Akileraarutit ukiut tamaasa takussutissialugit suliarineqartassasut), Atassutip Inatsisartunut ilaasortaanit saqqummiunneqarpoq.

Kommunit akiligassanik kinguaattoorutit amerliartupiloornerujussuat pisassamaatit akilersinneqarsinnaanngitsut annertoorujussuarmik isumakkeerffigineqartarnerannik ilalik ingerlatiinnarlugu iliuuseqarfigineqartariaqartoq Akileraartarnermut Akitsuusiisarnermullu Ataatsimiititaliap aalajangiisimavaa. Qitiusumik akiliisitsiniartarfeqarnermik pilersitsinikkut pisariillisaanerup kinguneranik qanittukut iluaqutissarsiasat Naalakkersuisut naatsorsuutigisaasa, kommunerujussuannortussanilu akiliisitsiniartarnerup aaqqissuuteqqinneqareerluni ukiualuit ingerlanerini naatsorsuutigineqarsinnaasumik pitsanngoriaatissatut nassatarisassai qularnarnerusutut isigineqarsinnaasut akornanni naliliisoqassappat Naalakkersuisut inatsisiliassatut saqqummiussaataq salliutinneqartariaqartoq Ataatsimiititaliaq naliliivoq.

Taamaakkaluortoq qitiusumit aaqqiissutissap inaarutaasup ilusilerneqarnissaa kiisalu tassunga atasumik aqutsinikkut aningaasatigullu kingunerisassat naliliiviginissaat KANUKOKA-mut annertunerusumik isumaqatigiissutigineqarnissaat Naalakkersuisut iluatsisimannngimmassuk Akileraartarnermut Akitsuusiisarnermullu Ataatsimiititaliamit ajuusaarutigineqarpoq.

Tunngavissat inatsisissatut siunnersuummut tunngaviutinneqartut ilumut malinneqarnerusut ukiuni tulluuttuni Ataatsimiititaliamit malittareqqissaarneqassapput, ingammillu ukununnga tunngasut:

- Kommunit akiligassat nikerarnerat,
- Kommunit akiliisinnaassuseqarnerisa inissisimanerat,
- Namminersornerullutik Oqartussanut kommuninullu aningaasaqarnikkut aqutsinikkullu kinguneqaatissat allat, aamma
- Innuttat inatsisitigut isumannaatsumik inissisimanissaat.

Tamatuma saniatigut Akileraartarnermut Akitsuusiisarnermullu Ataatsimiititaliap ersarissumik naatsorsuutigaa iluarsaaqinnermut attuumassuteqartumik sulisoqarnermut tunngassutilimmik apeqqutit, sulisorisat pineqartut atorfillillu kiisalu taakku sulisutut kattuffii pitsaasumik paaseqatigalugit tassungalu ilanngullugit nuunnerit, atorfillit allamut inissineqarneri suliasallu allanngorneri Naalackersuisut aqqissinnaajumaaraat.

Inatsisiliortut iluarsaasseqqinnermut naatsorsuutigisaat ulluinnarni piviusunnngortinneqarsinnaanngitsut pasitsaanneqassagaluarpas akilersuiveqarnerup iluarsaateqqinneqarnera Akileraartarnermut Akitsuusiisarnermullu Ataatsimiititaliamit kingusinnerusukkut naliliivigineqarlunilu iluarsiivigineqarumasinnaavoq. Akilersuiveqarnikkut iluarsaasseqqinnerup iluatsinneqarnissaa qulakkeerumallugu Naalackersuisut kommunillu qanimut suleqatigiissasut Ataatsimiititaliap kaammattuutigissavaa. Arlaannaannulluunniimmi iluaqutaanaviannigilaq kommunit aningaasaqarnerat Kalaallillu Nunaata aningaasaqarnikkut nammineernerujartornermini aqputaa akiligassatigut kinguaattooruteqarnermit ajornerulersinneqassappata.

Akileraartarnermut Akitsuusiisarnermullu Ataatsimiititaliap inassuteqaataa.

Akileraartarnermut Akitsuusiisarnermullu Ataatsimiititaliap isumaqatigiittoq siuliani oqaaseqaatini tunngavigalugit inassuteqarpoq Naalackersuisut allannguutitut siunnersuuteqarnissamik ilimasaarutaanni takuneqarsinnaasutut allannguutinik ilallugu siunnersuut aappasaanerineri saqqummiunneqartoq Inatsisartut akuersissutigissagaat.

Taama oqaaseqarluni Inatsisartut Akileraartarnermut Akitsuusiisarnermullu Ataatsimiititaliaata siunnersuut Inatsisartuni aappasaaniigassanngortippaa.

Kristian Jeremiassen
Siulittaasoq

Ole Thorleifsen

Ruth Heilmann

Juliane Henningsen

Lene Knüppel

[Ilanngussaq](#)

[Ilanngussaq](#)

[Ilanngussaq](#)

[Ilanngussaq](#)

[Ilanngussaq](#)

[Ilanngussaq](#)

[Ilanngussaq](#)